

وردتين لأُمى

شعر بالعامية المصرية

حمدى عبدالرازق

الطبعة الأولى

الكتاب : وردتين لأمى

المؤلف : حمدى عبد الرازق

تصنيف الكتاب : شعر بالعامية المصرية

تصميم الغلاف : محمد جمال

المقاس ٢٠ × ١٤

رقم الإيداع : ٢٠١٥ / ١٥١٦٩

الترقيم الدولي : 9 - 079 - 776 - 977 - 978

دار بسطرون

للطباعة والنشر والتوزيع

طباعة وتوزيع الكتب فى جميع أنحاء العالم

المكتبة والمطبعة : ٣ ش صفوت - محطة المطبعة

شارع الملك فيصل - الجيزة

جمهورية مصر العربية

٠١١٥٧٧٦٠٠٥٢ - ٠١٢٢٩٣٠٠٠٢٩

تصميم و إخراج : أحمد عبد الحليم

رئيس مجلس الإدارة : عماد سام

جميع الحقوق محفوظة للمؤلف

الإهداء

العكاز جنب الباب
برشام السكر و الضغط
والمرهم جنب سريرك
والقلم المقصوف سنه
في إيدك
راح تعمل إيه؟

حمدى

obeikandi.com

وردتين لأُمى

الوردة الأولى :

أنا قلت باحبك دلوقتى

بس ما قلتش أمتى الحب بدأ

ما اعرفش أحدد يوم

ولا سنه

ولا شهر

أنتِ فى دمتى

من أول سرسوب

ولآخر نهننه ع القبر

من أول شيله

وأول حطّه

ومروراً

بجبيره فى إيدى

وشاش ع الراس

ودموع فى عينيكى

وأنا ماسك فى اصحابى

ويقطع إيد اللى يمسك بالسوء يا ضنايا

أنا عاوز احبك

أد العمر اللى زرعتيه

والهم اللى حصدتيه

وعدوى اللى خرمت له عينيه

وانت بترقيني

وبآجى لك وأنا مهزوم

تجبرى كسرى

وآجى لك وأنا فرحان

تغزلى نصرى

وآجى لك غضبان

ترقینى

ترقینى

ترقینى

وكان العين صاياني

وانت الى عينيك حرس

ينساكي إزاي الى اتغرب

وانت معاه

قدامه ووراه

في الشغل

ووقت اللعب

ووقت ما عينه تزوغ

على حب الرُمان ويقرب

فترديه بإيديكي لعقله

إزاي ينساكي

وانت اللى بتكوى له قميصه

وبتخبزى عيشه

وتنقى له الأحلام م الواغش

وتنقى له الميه من العكره

وترقيه م النظره

وتَقْفَلِ على زاده لبكره

لما ابواب السما تَضَيِّقُ

ياخدك فى ايديه ع النيل

ويقول لك على وجعه

على آخر زاد حطه فى جوفه

على آخر بوسه

وآخر ضمه

آخر كف

وآخر دمعته

آخر عيد

آخر لبس جديد

الوردة الثانية:

أكيد م القمر متضايقه

وماقدرتش

أحقق حاجه من احلامك العايقه

أنا ما قدرتش أبقي الضابط الغندور

ولا قلت ولا لمحت يا غاليه

بشيء من ده

وأحلامي ما بتعديش على جمرك

ولا بتاخذ من الدولة إذا مرت هنا

تصاريح

فسامحيني

أنا الهربان من الأيام

وأنا برضو طريد بكره

وحلمي اتحقق امبارح

بييجي قصادي من سنوات

من البدرود إلى البدرود

وم اللفه إلى اللفه

اديكِ كبرتِ

وابنك برضو أهو بيكبر

شوفيه في الدنيا عامل إيه

أكيد مش حلو في المنظر

لاعود أخضر

ولا عيل بيتأخر لنص الليل

وأنا دلوقت آخر العمر

وباتاخر لنص الليل

وباصحى الصبح من بدرى

وشغلى برضو يا أمى

ايهد الحيل

واهو حلمك بيتحقق

مع واحد

لقيته فجأة في الاتوبيس

بينده لى وبيقول لى:

أنا ابنك

أخدتہ بجد بالأحضان

دفع لى أجرة الأتوبيس:

يا بيه خيرك مغرقنى

كفايه إنك روتنا صغار

بلا كلفه

وعندى كتاب

عليه إمضاءك الطيب

ملان أشعار

كثير كنا عيال أندال

لكن عمرك ما ردتنا

ولا بإيدك قفلت الباب

يا دوب زقه

وزعل بعتاب

فدول يا أمى أولادى

أنا زادك

ودول زادى

وأحلامى مع الكراسى والطباشير

وقدامى زغب زغاليل

وبادى لهم بإيدى الحب

أنا ليهم يا امى الريش.

أغنية الدم

والله ما شفت إلا الدم في إيدي

ولا شفت رصاص ولا صوت

كان قدامى وبيشاور

فجأه لقيته بيتطوح

جتنه بتميل ناحيتي

وإيديا بتسند راسه

أنا ما اعرفهوش

أنا ساكن هنا

ولا قال لي كلام

يمكن عينه قبل ما تقفل

كان فيها كلام

بس أنا عيني على الدم الى في إيدي

و قميصي

واللى مغرقنى

ما اعرفش اسمه

ولا عنوانه

ولا مين موته

صدقنى يابيه

أنا خفت

وإن كنت اقدر أهرب

كنت هربت

والله ما شفت إلا الدم

عنوان بيتى؟

كنتم قدامه من شهرين

موجود عندكو فى الأوراق

أنا من حقى امشى فى أى مكان

وأصاحب طوب الأرض

واحلم بأمان

أقتله؟

أقتله ليه؟

واستنى لغاية ما الناس تتلم

وأغطيه بالجرنال

واستنى الإسعاف

وأشيله مع الجدعان

الى بيقتل بيغطى الوش

يهرب قبل ما حد يشوف

أنا ما اعرفهوش

كام شاهد؟

عشرة؟!

ولا واحد كان ويانا

ولا شفت إلا إيدين الجدعان

بتشيله قصادی

كانم فین دول یا سعادة البیه؟

لأ ما اعرفهمش

اسألهم إیه جابهم وقت القتل؟

دولا شهود الزور

وشهود الزور قتلوه

أنا ما اعرفش إلا الدم اللى فى إیدی

.....

صقر ويمامة

طبعاً منصور على أعدائي

إن شاء الله منصور

مين أعدائي؟

انتم أعدائي

مين غيركم قلبه جسور؟!

هو أنا هاقدر أعيش

من غير أعداء؟

انتوا الدوا وإيدينا الفاضية

وعينينا المكسورة

وانتو الداء

وإن كانت إيد بتططب

إيد بتعض

إيد بتقول لى تعالى

وإيد بتقول لى فراق

إيد سم وإيد بلسم

إيد ملح وإيد فنضام

الأيام واقفة على دماغى

وعينى حجر

والمصروف ما يكفیش البيت

إلا بالدين

واهى ماشية الحال

بس بأوجاع

والرزق يبيجى بباع ودرع

وعينيكى إن كانت صقر

فعينى وداع وسلام

وورود و حمام

هو الصقر ما فيش في عينيه إلا الدم

ما يعرفش إلا الخوف؟

أكيد بيحب اولاده

عارف أخبارهم

ليهم أسرار وياه

ومحوش حوادث ليهم

في دروس الطيران

وبيتمنى يعود ليهم

سالم غانم

بالأكل وبالدفأ

وبيستناهم

وبيقلق لو غابوا

ويخاف م الصياد

طبعًا زينا ليهم أعياد

ومواسم بكا ونواح

أنا إنسان

ولا حداية ولا صقر

إيد أرنب وعينين مولود

يعنى المس حرير

والنظرة أمان

والباب متوارب

ادخلوا جوايا

أنا مستنى

زيارة

استنيت الشعر يجيني ما جاش

قلت أروح له

فلقيته على سريريه

حواليه أحبابه

فقلت: سلامتك

قال لي: اهي راحت

قتلونى ولاد الإيه

في معارك خاييه

الله يسامحهم

ودونى البحر وجيت عطشان

وفي وسط الفرح بقيت حزنان

مش عارف ايه يا اولاد جاني

فلا أنا زعلان

ولا أنا فرحان

مذهول من كثر اللى باشوفه

الأمر خطير

يا أولاد الشعر

يعنى ما نعيش؟!

ما لقتش الدوا الا فى طنطا

ولقيت منه شريط واحد

وانا ساكن فى ضواحي الجيزة

ودفعت مواصلات ومناهده

أد فلوس الدوا مرات

يعنى ما نعيش؟

مالك؟

فيه حد بيعيا بخاطره

ويتمنى الرقده؟

فيارب اعفينى

من السفر المهلك

اعفينى من مشاوير الحُكما

خلى الشفا بالدعا

أو شيل عنى الأمراض

أو خلّى الموت

فى نهاية الخدمه

فضفضه

عن كل ذنوب الدنيا باتوب

إلا عن حبك يا اميرة

وأنا كلى ذنوب

وإن كانت كل الأبواب مفتوحة

لكن على بابك واقف

يا كتيرة الخير

يا عزيزة النفس

يا رماحه

يا اللى فى وسط الناس

تفاحه

ولكل فواكه عمرنا

طراحه

نهجر ونغيب وانت بتسألى
ولا بتحرّمى ولا بتحللى
عينك ع الباب
وعلى الأولاد
وإن نرّ الجرح انت المشفى
وإن كان ع الوقت بتستنى
وأنا كلى عيوب بس باحبك
ومانيش من دول الى سابوكى
خايفه وفى الطل
تفطرى إهانات
وتحلّى بذل
وشגיעهم أول من ولى
وانت بتندهى أنا عايزة الحل
والحل ماهوش عند الأجنبى

ولا هوَّ غياب ولا تتهربي
الحل مواجهة اولادك
الناصح فيهم ويا الغبي
الحل في إيدك مش عنده
وطباع أولادك بيعاندوا
لا بيتنحرروا ولا يتساندوا
هيقول لك قبل ما يتحرك
أنا إيه مكسبي
بتخافي على شعورهم خافي
هيجولك مشي على اكتافي
وابقى الغلطان وابقى المكسور
لوخطفوا الزاد ويا لحافي
هما اتعودوا ياخدوا ما يدوش
وان يخزوا العين يدوكي فشوش

هما بيهرىوا من قدامك

وان كان ع الغنا ما بيستغنوش

يستغنوا ازاي وانت ندهم

لو لبسوا وشوش مين عارفاهم

وإن فرغ الزاد منهم ييكوا

وإيديكى بتربط فى حشاهم

شباك موارب

قمره وحطت فوق شباكي

جاي وراكي

مش شايفاني؟

برضوا وراكي

وعلشانك كنت باسيب

بابي موارب

اعمل سلم واطلع بيه للسطح

واتمنيت يبقى لى عينين

علشانك

واتمنيت ارجع تلميذ

واستنى ميعاد الدرس

الحلم اتحول لحقيقة

وبقى له وجود

انتِ حضرتِ

انتِ مشيتِ

انتِ طلعتِ

انتِ أُمِرتِ

انتِ النّسمة

الى تعدى على جبينى

وبترمى سلام

وترطب صهد سنينى

فإزاي أنا كنت سعيد

وانت بعيدة؟

هل كنت سعيدة

قبل وجودك جنبى؟

بلطجه

الراجل الى عينيه بتنقط طهر

وايديه بلسم للجرح

وقلبه يساع العالم

مكسور

دا لإن عيال الحى رموا له زباله

قصاد بيته

حرقوا السور

واتخانقوا معاه امبارح

وقالوا له كلام زى السم

عيل منهم قال له بقسوه وغل:

المره الجاية فى الأولاد والهانم

يمكن ما اتهزش إلا من موضوع الأولاد
والهانم

وسألهم : ليه

ولا رد

أخيراً جات له رسالة على التليفون

من مجهول طبعاً

سيبك من العصافير اللى مربيهها ابنك

فوق السور

السور العالى تهده

الأشجار العالية تقطعها

كان الرد سريع:

طب قبل ما كنتم تحرقوا قولوا.

معركة

امبارح كنت بازور نفسى

وقعدت ساعات

واحايل فيها عشان امشى

فتقول لى إزاي؟

شرفت البيت

الشاي ع النار

ولا دُقت الشاي

ما باحبش أبقى غريب

وقفلت الباب

مين الى بيمسح فى الفوطة يا جماعه

إيد يه

ويد فى مكانى الى باحبه

وبتعرق إيدته على الأوراق

وبيرمي هدومي على الكنبه

وبينسى الشاى على الكومودينو

ويسيب الأكل

يعنى هتفضلوا ساكتين

يعنى خرستوا

طب اعمل إيه

بصراحه تعبت

غيرت القفل

وكالون الباب

أنا مش موجود

إياك تكتب على باب البيت

وإن كنت هتكتب

يعنى كلام

ابعت لى ايميل

ما تشلش الورقه من ع الباب

نغم تايه

اللحن ما جاش وانا مستنيه
فنان وفي ايده العود
و ما حدش م الجمهور جاله
واهو واقف مستنى
و اللحن بيستعجله
محتاج يطلع للنور
لو عدى عليه الدور هيبور
يرجع للضلمه
يرجع لمكانه الأول
قبل ما يستدعيه
ويفكر فيه
هيبور

زى الأحلام والأرض

والناس الى اتظلمت

فى الثورة

زعل

وأدينا على الأوطان صابرين

وأكيد الصبر نهايته الخير

الصعبه ونس

والكتره تقوى القلب

ويا ريتنى عرفت الى ضربنى

ويا ريتنى جريت

الشوك فى طريق

والنار فى طريق

والرعب فى كل مكان فى البيت

مين الى غدر بى

طب عرفوا إزاي عنوان بيتى

وطريقى لشغلى وحواديتى

طیب لو جیت

مین فیکوا یا ناس هیروحنی

ویاریتنی بکیت

أنا كنت ارتحت

أنا قلبی حزین

وخاصمنی النوم

شهادة زور

دى ثورة مصر يا أولاد

خبيزنا وزيتنا وكتابنا

هنا كان الوطن حاضر

وغابت راية الأحزاب

وكنا فى الميدان بسمه

بلون واحد

هنا الإنسان

هنا واحد بيتوضا

وأخوه جنبه بيقرا الورْد

محاوْطهم إيدين جدعان

بنتناقش فى ثورة مصر

والثوار

وف التحرير نشوف أمواج

من المخاليق

ونبقى وسطهم ماشيين

مافيش غير الوطن حاضر

نقول له: آمين

ولا يفرقنا إلا القوم

ولا يصحينا إلا الثورة وهمومها

ومين حاضر ومين غايب

ومين باعوا ومين خانوا

ومين مربوط بأوطانه

هنا علم البلاد مرفوع

ولا نعطش ولا بنجوع

دفا اللمة وسط ميدان

يساع ملايين

هنا مسحت إيديها الدم

عن وشی
وعالجتنی بنطرة عين
من الأوغاد
من الی حبوا یبقوا بدالنا
فی المیادین
ولا حُنَّا ولا بعنا
وفی المیدان تفرقنا
وتجمعنا هنا الثورة
ولا یسرقنا إلا جهول
بیسرق إیه؟
بیسرق حلمنا الأخضر
بیسرق ثورة الأبرار
وبعد نهار
لا كان فی البال ولا الخاطر
لقیث طوبته بتجرحنی

لقيت سيفه على الرقبه
ومش معقول يكون هو
شريك الفرخ والأوهام
شريك الدمع والأحلام
أكيد مش هو يا صحبه
وإلا كان بيخدعنى بقلب جسور
شهور وشهور
وأقول يعقل
وترجع لمه الميادين
لكن ظنى طلع خايب
أتارى وقفته جنبى
مع الثورة
ومع الثوار
شهادة زور

ألبوم حكايات

هنا وقف الهوى ع الباب

ولا حَبَّط ولا استأذن

هنا غطى الدفا إيدي

هنا تلج الشوارع داب

هنا ضحكت

هنا مشيت

هنا كانت دموع بعتاب

هنا شجرة عنب رطبه

هنا مصالحه

وهنا معاتبه

هنا الرمان على عوده

هنا خلصت مناديلي

وكمى م الدموع غرقان

هنا ورتنى فى الألبوم

حكاياتها

هنا طفله

وهنا شابه

وهناك ع الشط

هنا اخواتها في مركب صيد

ودول صحباتها في الكوشة

وهى ماسكه والدتها

من الفستان

هنا فرحه وهناك أحزان

هنا الوقفه

وهناك العيد

ما دام الفرحة مسروقة

ما دام الضحكة مخنوقة

على وش النهار تجاعيد

هنا وقف الهوى ع الباب

ولا حَبَّط ولا استأذن.

أحلام في البدروم

سَلَّمَ ضَيَّقَ

وحيطان مايله

وآيات الجوع في وشوشهم

محفوره

وصورهم أبيض وأسود

أحلامهم أد إيديهم

وعينهم مكسوره.

الوحش

الوحش الى بيطلع لاصحابي

راعبنى

لدرجة إني باعدى لبيتى من خامس شارع

واستنى يعدى معايا

اتنين من جدعان الحاره الى قلوبهم ماتت

فجأة لقيتني قدامه

ولوحدى

الوحش قسمنى اتنين

لا عرفت اجرى ولا اصد

كان ضهرى للحيط

كان بينى وبين البيت خطوات

لكن ماعرفتش اعدى

واستنيته ياكلنى

أصعب شئ إنك تستنى الموت

الوقت إبر

ولقيتنى باصرخ من جوايا:

الموت جالك، خده بالأحضان

وبدال مابتستناه روح له ياميت

القيد اللى ف رجلى اتفك

واللى ما بينه وبينى بيضيق

الخوف انزاح

إيدى اتمدت

ولقيتنى باشده من شعره

ومن رجليه

وأنا باملا الدنيا صراخ

الوحش اللى راعبنى

لقيته حزين
وبيكى بحرقه
ويرفع إيدّه
دموعه بتسبق صوته
الوحش اللى راعبنى
ومطير من عينى النوم
كان نصه هدوم.

حُضْن

عصافير النيل مش لاقيه مكان تشرب منه

مساقيتها اتهدت

والطير المسكين بيلف لغاية النيل

لكن

قبل المنقار ما يسلم ع الميه

بياخده النهر في حضنه.

هو أنا كذاب؟!

من كدبى الابيض

أنا قلبى البرئ اسود

باتكلم جد

أنا كنت برىء زى المطره

زى الأحلام المسروقه

وباحب الناس والطير

باحلم و باغنى مع العصافير

وصباح الخير تمسح أحزان

ومساء الخير بتطفى نيران

دلوقت بنحسب أوقاتنا

إشارات إشارات

وبنحسب روحنا مع الأموات

الصبح يبداً بسيجاره

وكلام الغام

والناس في حياتنا المقلوبة

بقيت أرقام

عاشين بنقاتل بعضينا علشان أوهام

والناس اتبدلت في حياتها

بتعبد أصنام

العش الهادی

طایر بجناح مکسور
واهو طایر و خلاص
ویادوب بیحرجم فوق العش
شهود خرسا
وعیون عورا
ودفا کداب
وجوا القلب صوت مجادیف
لا شاف غیره
ولا زاده بینفع حد
یا دوب بیکفی حاجاته وبس
وبیته باب وشبر حصیر
وکنبه ومسمارین فی الحیط

وزاده لو فی یوم ینقص

یکفیه بلقمه یمش

ما بیعرفش حتی یغش

بیتعامل کانه غریب

ولا صاحب ولا صحبه

موت

عارف يعنى حاجات عن بيتها

عن صاحبته

عن جدتها العايقه

عن طفلتها النونو

عارف شكل مزاجها

امتى بتفرح

امتى الحزن يهد كيائها

كان ابنها مفتاح قلبها

صورته

وبعت له ألعاب

وبعت لمحموله رسائل

وقعدت استناها ١٢ شهر

فجأة صوتها ناداني

وكله جحود

مالك؟

قالت:

مات الى انت بتستناه

عبدالناصر

أبو قلب بحجم الكون

الله يرحمه

ويصبره ع اللى بياكلوا فى سيرته

بالكذب وبالباطل

ويخفف عنه حسابه الهين

الى قابلنى فى أول مشوار عمرى

ومش عارف آخر لقا امتى

عمرى ما شفته إلا فى منظر على حيط

وحيطان مصر بحالها كانت صورته

والسماء كانت عينه

والهوا متعطر بالأنفاس

شفّت جنازته

وأنا متشال على كتف أمى
الله يديها الصحة
فرجه ولا فى العمر تشوفها
جنازه بتبدأ م الصحرا
وتخلص آخر الكون
والناس واقفة
طوابير طوابير
لجلال الموت
واقفين يستنوا قدرهم
يمكن يصحى يقول للناس اصحوا
على رجائى دموع أمى السخنة بتتسرب
وبتنزل على جسمى
عبدالناصر من قرايينا يا أمى؟
اكتر يا ابنى

يعنى احوالى ولا اعمامى

اللاتنين

إيديها تسكتنى

وهى بتعشى أبويا الى رفض ياكل لقمة
وقال لها:

شيلى الأكل وهاتى الشيخ محمود يقرأ ربعين
على روحه، والشيخ محمود جارنا الأعمى
الغبان الى مزين صوته القرآن، واللى ما
قدرش يكمل آيتين وقعد ييكى لحد ما نمت

باعشق عبدالناصر

الى عروقه بتنبض حريه

واللى الدنيا عرفت معنى العدل

على إيديه

داقت طعم الحريه

ولمست أنفاس الفقرا الوناسة

الى بيحموا شقاهم وعرقهم بزعيمهم الاسمر

جمع قلب المصريين على حبه

وحول مر اللحظة في بق الفقرا لسُكر

تشوفه تحس كأنه أبوك

أبو نظره تهز جبال وتطمئن

نظرة راجل كلنا عارفينه

وبيحمى عرينه

على سيرته بيد في الفقرا

بيحقق أحلامهم

وبيمسح على جرح الواحد

فيحس إن الجرح ماكانش

الاسمر الى الشعب اتعلم منه الصبر

ومعنى الحكمة

الراجل

الى بيحـمى شقاهـم وعرقهـم

وكأنك عصفور

يلقـط حـب

فتكفيه نظـرة فيشـبع

أو ملـه فيدفا

مساكين أعداؤه

لو عرفوه هـيحبوه

كانوا اعتذروا عن عداوتهم

هل كرهوه علشان حوالـيه ظلمه

أو جيش اتـهـز في ٦٧

ده بطل من شعب

أو شعب بطل

مهزوم بشرف

يحتـمى بالناس وقت الكـسـره

فيكونوا معاه

انسحاب

لسة عندك دمع تانى؟
لسة فيه ضحكه فى عينيك؟
لسة فيه سكاكين مواجع
فيه قمر عامل غياب
فيه زعل محتاج عتاب
فيه كلام بيسن سيفه
يعنى جيش للحزن راجع.

راجع

راجع؟

لأ مش راجع

راجع

وإن كان الجسم ملان إصابات

والروح مكسورة

راجع

وإن كان البيت اتقسم

والإخوات أغراب

والعركه على الأوضه الى معاك

راجع

برضو احسن م الغربه

فالإخوات إن طمعوا اخوات:

الأخ

إن عض ما ييعورش

وإن عوّر ما ييدبحش

وإن دبحك هيغطيك

طبع ولاد آدم

من أول ما قابيل فكر في القتل

لغاية ما حفر له وتواه

أنا هذا المقتول

وانت القاتل

فعشان بطن شالتنا

وضحكه ضحكناها

ولقمه قسمناها

سن السكين قبل ما تدبح

خلى رقبتى فى جسمى

وبلاش تصوير

لفنى فى هدومى

وروح الشغل

يا ابن أمى وابويا

فيه ناس هتقوم بالواجب

هيقبلوا فى الجته

لغاية ما يلاقوا الأوراق

تليفونك هيرن فتنخض

وتهدد وتبرطم بكلام سم عن القتل ولاد

الـ...

بس ما تنساش تيجى العزا

وانت مدمع

وتقول وسط الناس:

هنجيب حقه

بس اوعى تخلى الناس تاخذ بالها

من الدم

الى فى إيدك وهدومك

يا ابن امى وابويا

ارتحت؟

ارتحت

بس ما تفرحش كتير

برضوا اخوك الثانى

هيقوم بالواجب وياك

خليك ذوق وياه

علشان تبقى إيديه

ارحم من إيدك

وسلام.

معاتبه

مالك يا كلام

عاصى على لسانى بقالك مده

ما طرقت الباب ولا قلت سلام

مالك يا كلام

يا بخيل

ويا خف الريشة ووزن الفيل

قل لى اعمل إيه علشان تيجى؟

هو إحنا يا راجل مش أصحاب

فيه عشره معاك

ولا انت نسيت؟!

ولا انت عرفت جيران غيرنا؟

ورضينا القسمة إننا نبقى

ضمن الأحباب

فتزورنا قليل ولا تكثر

كثر خيرك

بس أنا مستنى على الأبواب

واكيد هتجبنى فى يوم فرحان

أو حتى حزين

أنا باستناك

سامع يا كلام؟!

مین غیرک؟

مین یقدر ع الهم

إلا انتِ

مین هیداوی جراحنا

ویوقفنا طابور

فی الندی

مین هیشیلنا

ومین هیحط

مین هیودی

ومین هیجیب؟

ویطبطب ویداوی إلا انتِ

مین یقدر علی قلب الشعرا

إلا الشعرا

ولا یقدر علی قلبك یا بلادی

إلا الأبطال

مين يقدر يزرع سنبله

وتجهز قنبله للعدا

ويداوى جراح ماعملهاش

ويرش ما ورد على الميه

ويرص مصدات للدخان الأزرق

عن عينك يا بهيه؟

مين يقدر يؤمر أمر كده

لعمالك ومزارعينك وعيالك فى الشارع

بيقوا مصايد للخوف

والكراهيه العميا

مين اللى يوفر من زاده

وزاد أولاده

ويسهر بدل الساعة يومين

لعيونك يا بلدنا

مين يقدر؟

نَزَّلَ عَنِي

أنا شايِل فوق كتفى

حاجات

نَزَّلَ عَنِي

لأحسن ما اعرفش أنزلها

فتتكسر

شايِل فوق كتفى الأول

عمرى الماضى

وشايِل ع التانى

أحلامى الجايه

والشيله ثقيله

فنزل عنى الماضى

أو نص الحاضر

أو ربيع المستقبل

نَزَّلَ عَنِّي عِلْشَانَ ارْتِاحٍ

وَاتَعَامَلَ بِبَسَاطَةٍ

وَاحِبِ النَّاسِ

وَأَبْطَلَ أَصْحَى فِي نَصِ اللَّيْلِ مَفْزُوعٍ

نَزَلَ عَنِّي

وَحَطَّ إِلَى تَخْزِنِهِ تَحْتَ الْأَرْضِ

وَارْمَى الْمَفَاتِيحَ فِي الْبَحْرِ

نَزَلَ عَنِّي

عام الرماده

دى مدينة حزينه

مافيهاش ستات ولا صبايا

بيرقصوا

لا بيضحكوا

ولا بيقولوا نكت

أو يسألوا حد

ومافيش أبواب مفتوحه لضيف

ولا مسقى للعصاير

هتشلنا بلاد

ترميننا بلاد

وغموت على أرضك يا بلادنا

مع إن بلاد الغربة قانون

بيعدى على المخاليق

يدوا له سلام

شغيله وبيحبوا بلادهم

ولا اكر ولا اقل

والأوطان مالهاش حسابات بالمسطره

وبلاده الى اتعدى بخيرها

شرب من نيلها

وشاف غربانها وعصافيرها

وقسم اللقمه الى موفرها معاك

دى بلادُه:

حضرها أدفا

ناسها ونس

وبلاد الناس الثانية بلاد غربه

تمشيها سنين

ونعود إليك

يا فقيره وخيرك للأغراب

يا أميرة وصالبينك ع الباب

يا غنيه وإيدك ممدودة

كبيرها وصغيرها

ستاتها وبناتها

عيالها ومجانينها

إيدين ممدوده لفوق

بعد ما زهقت من مدتها لتحت

ولا بيوم بيعدى إلا وفيه موت

والناس بطلوا ييكوا

يمكن يحتاجوا الدمع في يوم العسره

لكن برضوا الواحد ما يمتش هناك

الموت هنا ونسه

الواحد برضو يموت وسط اولاده

ويصلوا عليه

وتزوره مواسم

وتعدى عليه إيد الرحمه

يتونس بالأعياد

ولا يتغرب إلا المضطر

ولا ينسأك إلا الخاين

ولا إيدك تتمد إلا عشان

تنقذ أولادك م الغرقه

وسواس

مين اللى ربطنا ف حلق الباب

بسيور وحديد؟

كتفنا إيدين فى إيدين

وعينين فى عينين

واكتاف ف اكتاف

أنا باصرخ مش سامع صوتى

ولا صوت غيرى

ما يكونش دا موت

وأنا مستنى

حضور الملكين

وأكيد مش قبر

اللى احنا عليه واقفين

قبر بأبواب ومكاتب فوقها فازات

وسراير نوم؟

قبر و حوالیه أشجار

اسكت يا حمار

مين الی بیستم؟

طبعا جبانات

حبة حشرات

يا ولود الی اتولدت بصاجات

ومعاشره آفات

يا ولود الی والی والی

قولم علی اسم الی شتمنی

خلیکوا رجال

یعنی مافیش صوت

يا اولاد البخلا

يا حثالة كل الثورات

الضحك آهات

والرقص آهات

والبكا بآهات

وإيديكم دائماً ممدوده

مافيهاش غير هات

دا هواكم سم

يا اللى بتتاجروا فى بيع الدم

يا اولاد الغم

برضو وساكتين

عاوزنى اعك واسب الدين

والله لا يمكن أعملها

الجيران الطيبين

إلى الراحل الكريم الصديق
الشاعر مدحت قاسم

معقوله ماحدش دق الباب

أسبوع كامل

لو كانت قطه

كانوا ادوها لقمه وعضمه

فإزاي ينسوه أسبوع

ولادقوا الباب

ولا سألوا عليه

والحسبه إن جيرانه اعتبروه

عَزَل أو غاب

كان لازم قلبك ياكلك

وتصر تروح له

بعد ما رنيت على تليفونه

لغاية ما فصل شحن

وندهت عليه من تحت البيت

واستنيت طلته

اطلع

لكن ولا صوت ولا طله

المره دى

سكان البيت حفظوك

اتفضل

هو الأستاذ رايج مشوار؟

مش عارفين

شفتوه امتى؟

من كام يوم؟

أربع أيام ما ظهرش

يمكن عند ابنه

مش عنده

يعنى من السبت لغاية الأربع ما فتحش
الباب ؟

السلم بقى مدروز بالخلق

وايدين الجدعان خلعت باب الشقة

فلقوه عريان جنب الحمام

غطوه بلحافه وبالملايات

ودموهم ع الخدين أنهار

والإسعاف قدام البيت

كنتم فين يا إيدين العافية؟

غبتم ليه وقت الشدة؟

وليه الرحمة بتظهر

بعد فوات الوقت

يعنى لابد من الوقعة

علشان القلب يحن؟

obeikandi.com

المحتويات

الصفحة	النص
٣	الإهداء
٥	وردتين لأُمى
١٣	أغنية الدم
١٧	صقر ويمامة
٢١	زيارة
٢٣	يعنى ما نعيش؟!
٢٥	فضفضه
٢٩	شباك موارد
٣١	بلطجه
٣٣	معركة
٣٥	نغم تايه
٣٧	زعل
٣٩	شهادة زور
٤٣	ألبوم حكايات
٤٥	أحلام في البدروم
٤٦	الوحش

٤٩	حُضْن
٥٠	هو أنا كداب؟
٥٢	العش الهادي
٥٤	موت
٥٦	عبدالناصر
٦١	انسحاب
٦٢	راجع
٦٦	معاتبه
٦٨	مين غيرك؟
٧٠	نزل عنى
٧٢	عام الرماده
٧٦	وسواس
٧٩	الجيران الطيبين

